

禮記子思子言鄭注補正

禮記子思子言鄭注補正序

禮記中坊記中庸表記緇衣四篇相次焉。沈約謂此皆取子思子。有徵哉。漢志子思二十三篇。新唐志子思子七卷。蓋傳者微矣。其在禮記中者。坊記表記緇衣。其別皆稱子言之。古稱師曰子。知其爲子思門人記之也。則與中庸爲子思作而不稱子言之者。體例不同。九江朱先生曰。三篇子言之。皆子思子言也。斯從沈約說焉。韓文公曰。孟子師子思。而子思之學出於曾子。今讀此三篇。皆與中庸相發明。固承曾子而開孟子。絲絲乎其克以孔子之學世其家也。今之世。去子思子之世。雖遠云何。其言有逆觀今之世而先言之者。其在于今。變而通之。其學則體立用行。足以濟中邦斯民於生生也。朱子著中庸章句。今有賴焉。

若此三篇。明季黃石齋爲之集傳。將以納忠。猶未暇攷之深爾。禮家諸說。自鄭康成注以來。大抵釋此爲孔子言。而不察此爲子思子言。其有不安。則謂記言者之失也。殆讀其書而未論其世歟。春秋哀公十有四年春。西狩獲麟。是孔子所脩者。至獲麟止也。左傳哀公二十一年夏五月。越人始來。迨踰年而越滅吳矣。坊記曰。春秋不稱楚越之王喪。此子思子時魯春秋也。異於孔子所脩者。以吳楚言也。故坊記引論語緇衣引葉公之顧命。皆在孔子後也。子思子之世。由春秋時而將遞戰國時。周衰甚矣。故表記言周道者。言其民之敝。欲救其民之失道也。非譏周道也。烏可淆以孔子時。欲爲東周而言周監二代之文者乎。其他諸說。或於鄭注外不稽古訓。不參文法。遂執一以疵其言者。

妄也。將使記言者欲垂示天下萬世之心。無由明矣。胡亮不敏。冀有所明。致辯於斯。斯曰。禮記子思子言鄭注補正三篇分卷。而又附錄焉。都爲四卷。斯雖區區。以俟君子。昔嘗語同人口。三禮之學。漢鄭注尙焉。惟不無所遺也。亦不無所失也。惜乎唐孔穎達疏。不能補正以明之也。六藝論曰。注詩宗毛爲主。毛義若隱略。則更表明。如有不同。卽下己意。使可識別也。此詩鄭箋之補正毛傳也。漢季之後。遞宋以延於近代。禮家讀鄭注者。或補正焉。其說之散見者。則苦難見矣。其說之萃會者。則采之未皆狐裘粹白也。而鄭義之善者。或因以不章。且鄭義之善者。旣無須補正矣。孔疏申之。何其詳以博也。禮家或汎汎然又從而衍之。不亦繁乎。此學者所以言禮學之難也。況異學蔑禮。將曰。禮

失而求諸野望矣。其敢不懼邪。邇年方欲約禮家言爲鄭注補正。每分節以謹案明之。其後申以釋曰之辭。猶疏義也。其辯孔疏者亦列其中。雖訓詁之微。且不遺之。其宜音者。依陸德明釋文例爲音。可始學資也。朱子儀禮經傳通解。江氏禮書綱目。此宜有酌乎鄭注者。先導焉。庶幾博而有要。易而無難也。今朝亮乃年六十有九。于飛三日。旅巢悲秋。昔之志將莫畢歟。乃脩舊藁。其完者。惟子思子言三篇。其餘方草創。兼大戴禮。皆附錄存之。若禮運篇。明天下爲公爲家者。若學記篇。宜萬世法者。若儒行篇。皆孔子言而申其義者。藁中亦苟完矣。大戴禮所存。若曾子十篇。辯阮氏本誤登。非周公之言也。若武王踐阼篇。辯席銘。几銘。觴豆銘。戶銘。諸誤解也。若衛將軍文子篇。辯盧氏注未悉。

諸賢行狀也。是故禮說之要。實通時務。今所爲論語集注。述疏子適衛章。有旁及禮經者。論語答問。亦旁及之。若孔子之母殯於五父之衢。以左傳例之。斯殯故宅之禮也。而以爲道殯者。誣貞女。古禮有之也。而以爲非禮者。誣拜者。答者。皆由禮之性而生也。而以爲強制者。誣旣旁及詳焉。斯不具也。順德簡朝亮序。

禮記子思子言鄭注補正目錄

目次

補正序

卷一

坊記

卷二

表記

卷三

緇衣

卷四

附錄 凡附錄禮記儀禮周官大戴禮補正二百零六條

禮記子思子言鄭注補正卷一

順德簡朝亮述

坊記

坊古
通防

謹案禮爲民坊。反禮者刑。當命而令之。皆以助禮之坊也。非妄設坊也。子思子每言之。門人皆記之。故名之曰坊記。隋書音樂志稱沈約之言曰。中庸表記坊記。緇衣。皆取子思子。禮孔疏稱鄭目錄曰。中庸孔子之孫子思作之。釋文稱劉瓛之言曰。緇衣。公孫尼子所作。由是言之。中庸稱仲尼曰者。孫稱其祖之字而述之也。蓋猶禮祝辭所稱也。則中庸爲子思作之。信矣。若夫坊記表記。其篇首稱子言之。皆與緇衣例同。蓋稱子則著其爲師也。斯皆門人述子思

而作者歟。其篇首皆稱子言之者。別乎論語而變文也。其下或稱子云子曰者。以篇首既別。則無嫌也。皆子思也。非孔子也。故坊記引論語焉。坊記曰。春秋不稱楚越之王。喪其言越者。子思子據其時魯春秋而言也。故緇衣亦引葉公之顧命焉。葉公卒於孔子後也。葉紆涉反

釋曰。陸氏釋文引鄭云。名坊記者。以其記六藝之義。所以坊人之失者也。此據鄭目錄焉。鄭不統六藝爲禮坊。於義未融也。且坊記引論語矣。豈惟六藝乎。孔疏於坊記篇首稱子言之者。以爲一篇總要。故特稱也。是矣。而於坊記諸稱子云者。以爲其意稍輕。非也。其意皆承篇首而申焉。公羊傳有子沈子曰之文。何休云。稱子冠氏上者。著其爲師

也。不但言子曰者。辟孔子也。今記者首稱。別乎論語。豈可
稱子孔子曰邪。如稱子思子。則無以著其爲師矣。故首稱
子言之也。論語稱子云。吾不試。故藝。蓋子云有然。今記者
首稱則不同。是先變文以爲別也。漢志。子思二十三篇。公
孫尼子二十八篇。新唐志。子思子七卷。公孫尼子一卷。蓋
沈約在梁時有攷焉。劉瓛在南齊時有攷焉。漢志公孫尼
子下自注云。七十子之弟子。蓋班氏亦略言之爾。冠讀去
聲。辟與避通。邪讀若耶。

子言之。君子之道。辟則坊與。坊民之所不足者也。大爲之坊。民
猶踰之。故君子禮以坊德。刑以坊淫。命以坊欲。辟音譬
與平聲

鄭氏曰。民所不足。謂仁義之道也。失道則放辟邪侈也。又

曰言嚴其禁。尙不能止。況不禁乎。命謂教令。辟與僻通

謹案此經文之首。蓋一篇總要焉。禮謂道之節文。得中者也。民之失德。或太過。或不及。而皆有所不足焉。若民習不美。其所不足尤多也。故正民德者。必禮以爲之坊矣。禮大道也。大爲之坊。民猶踰越之。安可無助禮之坊邪。明乎出禮則入刑。不可無教命也。故經下文每曰。以此坊民。蓋謂禮坊焉。非皆列其踰禮坊若斯乎。周書呂刑曰。伯夷降典。折民惟刑。遂曰。伯夷播刑之迪。蓋伯夷典禮。其折民者。播告以刑而迪命也。周官大司徒曰。以五禮防萬民之僞。而教之中。又曰。以鄉八刑糾萬民。蓋教命以糾之也。坊猶防也。淫者非禮之甚也。欲者非禮之漸也。糾吉西反

釋曰。禮經解云。夫禮禁亂之所由生。猶坊止水之所自來也。蓋禮嚴其禁焉。故刑法命令其禁皆宜嚴矣。此鄭義也。伯夷舜時典禮者。詳尚書集注述疏。周官大司徒言五禮者。鄭司農謂吉凶賓軍嘉也。其言八刑者。謂不孝不睦不嫺不弟不任不恤。造言亂民之刑也。嫺與姻通。或曰。命如孟子謂有命焉之命。故以坊欲也。然命當罕言。何以坊民乎。是於經下文不貫矣。

子云。小人貧斯約。富斯驕。約斯盜。驕斯亂。禮者。因人之情而爲之節文。以爲民坊者也。故聖人之制富貴也。使民富不足以驕。貧不至於約。貴不慊於上。故亂益亡。

慊音歉。亡古通無。

鄭氏曰。約猶窮也。此節文者。謂農有田里之差。士有爵命

之級。嫌恨不滿之貌也。嫌或爲嫌。差楚宜反

謹案左傳曰。在約思純。蓋非以責民也。孟子曰。若民則無恆產。因無恆心。苟無恆心。放辟邪侈。無不爲己。此論語所以言富之也。富之則民不貧。曲禮所謂庶人之富也。庶人而能仕者斯貴焉。經所以由富而及貴也。禮說嫌。古通嫌。因爲異文。貴不嫌於上。則無僭亂矣。益者漸進之辭。亡古通無。大盜亦亂。故統言之。論語曰。好勇疾貧。亂也。此盜亂也。議者曰。古制恆產。今不能然。如薄稅斂以富之。則節而有文也。是禮也。其無盜亂乎。子思子言禮爲民坊而先及盜亂也。可不念乎。

釋曰。古制。百畝之田。五畝之宅。里居及焉。其差等也。公侯。

伯子男爵也。卿大夫士亦爵也。自一命至九命非九級歟。周官詳矣。此鄭所據也。引左傳者昭二十八年文。漢書趙充國傳避嫌作避嫌。蓋古通也。

子云。貧而好樂。富而好禮。衆而以寧者。天下其幾矣。詩云。民之貪亂。寧爲荼毒。故制國不過千乘。都城不過百雉。家富不過百乘。以此坊民。諸侯猶有畔者。好去聲。幾如字。荼音徒。乘去聲。

鄭氏曰。天下其幾矣。言如此者寡也。寧安也。大族衆家恆多作亂。詩言民之貪爲亂者。安其荼毒之行。惡之也。古者方十里。其中六十四井。出兵車一乘。此兵賦之法也。成國之賦千乘。雉度名也。高一丈長三丈爲雉。百雉爲長三百丈方五百步。子男之城方五里。百雉者此謂大都三國之

一。行去聲。惡。
鳥路反。

謹案論語曰。貧而樂。謂樂道也。今言好樂者。好此樂也。論語曰。回也不改其樂。蓋好此樂矣。詩大雅桑柔篇。荼苦者。謂苦毒。千乘百里之國也。孟子曰。周公之封於魯也。爲方百里也。地非不足。而儉於百里。謂其制之不過焉。子思子當周衰之季。由春秋時而將遞戰國時。天下不從亂者幾何。列國諸侯。率大夫家富專都城者。兼并違制。而畔天子也。於是乎貧民從之。而荼毒甚矣。故子思子言之。則多危辭。蓋以明禮坊之必不可失也。并府
盈反

釋曰。詩蟋蟀云。好樂無荒。或以疑此經非也。詩豈爲貧者言乎。鄭注言千乘者。蓋自周官及司馬羶之制。而推之也。

孔疏申之。亦失之矣。周官大司徒云。諸公之地。封疆方五百里。豈不異於孟子乎。襄二十五年左傳云。昔天子之地一圻。列國一同。自是以衰。此子產之言也。孟子之言。猶此也。圻與畿通。王畿方千里也。同者。攷工記所謂方百里爲同也。以百里而開方。則萬里矣。况方五百里者乎。何其制之過也。衰讀若等差之差。論語包氏注云。古者井田。方里爲井。十井爲乘。百里之國。適千乘也。今攷詩魯頌云。公車千乘。遂云。公徒三萬。蓋一乘三十人也。周官小司徒注。引司馬灋云。革車一乘。士十人。徒二十人。其數與魯頌同。今孔疏引司馬灋云。長轂一乘。甲士三人。步卒七十二人。其數則又不同。蓋司馬灋有田穰苴附之爾。非皆古之制也。

史記言之矣。隱元年左傳云。大都不過參國之一。參猶三也。

子云。夫禮者。所以章疑別微。以爲民坊者也。故貴賤有等。衣服有別。朝廷有位。則民有所讓。夫音扶朝直遙反

鄭氏曰。位朝位也。

謹案章明也。經上文曰。禮者。因人之情而爲之節文。以爲民坊者也。蓋禮有節文。於人情疑者。章明之。微者別察之。故此文曰。夫禮者。所以章疑別微。以爲民坊者也。禮之章疑者。皆欲別微。斯凡事如禮而止所淫。則人情無嫌矣。豈不可紀乎。故經下文曰。夫禮防民所淫。章民之別。使民無嫌。以爲民紀者也。經以三者特挈其文。互通其義。而遂以

其義之尤易見者各隸其文而敘焉。周書無逸曰。則其無淫于觀。于逸。于遊。于田。左傳曰。酒以成禮。不繼以淫。是不惟若詩關雎序言不淫其色也。而淫色尤易見者。故經遂分言之。則其餘可推也。禮本德坊淫。反禮者刑。故曰。刑以坊淫。學者觀其會通可也。易以智反

釋曰。史記有章明較著之稱。經下文鄭注云。章明也。今以舉於前爾。中庸云。文理密察。足以有別也。今言別察其微也。周書言淫于逸者。若淫聲之樂該其中矣。引左傳者。莊二十二年文。禮家說於經文特挈而言禮者。惟三分之一。而不以爲互通也。則經文若參差然。荀子王制篇云。夫兩貴之不能相事。兩賤之不能相使。是天數也。勢位齊而欲惡

同。物不能贍則必爭。爭則亂。亂則窮矣。先王惡其亂也。故制禮義以分之。使有貧富貴賤之等。足以相兼臨者。是養天下之本也。荀子說與坊記略同。所異者。子思子自性善而言制禮。荀子乃自性惡而言之。學者辨焉。

子云。天無二日。土無二王。家無二主。尊無二上。示民有君臣之別也。春秋不稱楚越之王。喪禮君不稱天。大夫不稱君。恐民之惑也。詩云。相彼盍旦。尚猶患之。相去聲。盍音曷。

鄭氏曰。楚越之君。僭號稱王。不稱其喪。謂不書葬也。春秋傳曰。吳楚之君不書葬。辟其僭號也。臣者天君。稱天子爲天王。稱諸侯不言天。公辟王也。大夫有臣者。稱之曰主。不言君。辟諸侯也。此皆爲使民疑惑。不知孰者尊也。周禮曰。

主友之讎。視從父昆弟。晝夜鳴求旦之鳥也。求不可得。人猶惡其反晝夜而亂晦明。況於臣之僭君。求不可得之類。亂上下。惑衆也。辟與避通。皆爲之。爲去聲。從才用反。

謹案經下文再引春秋者。皆曰魯春秋。明非孔子所脩者也。魯春秋猶去夫人之姓曰吳。其死曰孟子卒。今孔子所脩者。削書吳之文。魯春秋記晉喪曰。弑其君之子奚齊。及其君卓。今孔子所脩者。削書及之文。蓋所引爲魯春秋也。而此引春秋不言魯者。以此稱楚越。則表其爲魯春秋矣。孔子所脩者。於哀十四年獲麟絕筆焉。哀二十一年左傳曰。越人始來。始通魯也。通魯而史乃有書哀二十二年年左傳曰。越滅吳。越王句踐滅之也。故坊記稱楚越。明與春秋

傳稱吳楚者不同。蓋越王句踐之喪。則在孔子所脩春秋後矣。子思子引魯春秋而不引孔子所脩者。以其大義略同。故引國史則其時共知也。詩逸詩相視也。句音鉤

釋曰。引春秋傳者。宣十八年公羊傳文。鄭據孔子所脩春秋而言。故其言越者。於義未析也。孔疏以爲非當時之事。亦失之矣。莊七年公羊傳云。不脩春秋曰。雨星不及地尺而復。君子脩之曰。星實如雨。蓋不脩春秋者。孟子所謂魯之春秋也。其在子思時。魯春秋必有續書者矣。魯春秋於楚之王喪既不書。於越之王喪亦不書。後史如前史之例也。孔子所脩者。不書楚之王喪。因魯春秋也。此所謂筆則筆也。而又有削則削焉。故孟子則謂孔子作春秋也。引周

禮者周官調人職文鄭但取其稱主之言非以坊記此經
言讎言友也襄十九年左傳宣子於大夫荀偃稱主矣鄭
調人注据焉兩星之兩讀去聲震與隕通或曰易說卦云
乾爲天爲君此孔子說也故孟子稱孔子曰天無二日民
無二王今子思子言之何以不稱孔子說乎夫孔子述而
不作斯有天下公言而孔子述之者矣禮喪服四制云天
無二日土無二王國無二君家無二尊以一治之也大戴
禮本命篇略同其說皆無繫所稱也公言也坊記稱家自
大夫而言故曰家無二主喪制稱家統庶人而言故曰家
無二尊其理同也相視爾雅釋詁文

子云君不與同姓同車與異姓同車不同服示民不嫌也以此

坊民。民猶得同姓以弑其君。

鄭氏曰。同姓者。謂先王先公子孫有繼及之道者也。其非此則無嫌也。僕右恆朝服。君則各以時事。唯在軍同服爾。謹案嫌者似君之嫌也。示民不嫌也者。欲辨其似君之漸也。得同姓者漸得之也。易文言曰。臣弑其君。子弑其父。非一朝一夕之故。其所由來者漸矣。由辨之不早辨也。

釋曰。僕御僕右車右。孔疏詳矣。陳氏結云。不同車以遠害也。此大失經義焉。將同姓皆可疑乎。異姓同車。豈不害乎。且害者何必同車乎。曲禮云。齒路馬有誅。夫齒君馬之年而罰之。豈以其害乎。非以其有不敬之嫌乎。今經言不嫌。是嫌其似君而止之也。非猜疑之謂也。此異於楚令尹威。

儀似君之實也。故謂之嫌也。釋經者何爲因陳說而疑經乎。令尹詳左傳襄三十一年。

子云。君子辭貴不辭賤。辭富不辭貧。則亂益亡。故君子與其使食浮於人也。寧使人浮於食。

鄭氏曰。亡無也。食謂祿也。在上曰浮。祿勝己則近貪。己勝祿則近廉。

謹案孔子聖人也。而嘗爲委吏乘田。蓋人浮於食者若斯矣。故孟子稱其宜曰。辭尊居卑。辭富居貧。斯君子心也。雖貴者尊以富。辭之而不居也。雖賤者卑以貧。居之而不辭也。乘去聲

釋曰。子云自此以下本或作子曰。釋文稱焉。蓋異文也。書

盤庚說云。浮勝也。

子云。觴酒豆肉。讓而受惡。民猶犯齒。衽席之上。讓而坐。下民猶犯貴朝廷之位。讓而就賤。民猶犯君。詩云。民之無良。相怨一方。受爵不讓。至于已斯亡。衽而審反。已音紀。亡如字。音忘。

鄭氏曰。犯猶僭也。齒。年也。禮六十以上。簋豆有加。貴秩異者。良善也。言無善之人。善遙相怨。貪爵祿。好得無讓。以至

亡己。

上時掌反。

謹案。惡猶癘也。曾子曰。庶人之孝也。以力惡食。衽臥席也。席。坐席也。曲禮曰。請衽何趾。又曰。請席何鄉。而敬尊者則衽亦坐下焉。就位之賤。尊尊也。若士讓爲大夫。大夫讓爲卿也。詩小雅角弓篇。毛傳曰。爵祿不以相讓。故怨禍及之。

比周而黨愈少。鄙爭而名愈辱。求安而身愈危。麤與粗通。鄉去聲。比

毗志反。

釋曰。禮說計年者。自生齒以上。故序年曰齒。鄭稱禮者。鄉飲酒禮也。周官有秩敘之稱。蓋祿秩異者。貴焉。論語說惡食。麤食也。引曾子者。大戴禮本孝篇文。竭力事之。以力也。孝子惡食。則其美養親焉。若幽風言采荼食我農夫也。釋詁云。元良首也。易傳云。元者善之長也。故良曰元良。斯善矣。鄭釋詩者。以爲其人無善而惟善怨焉。此於經文豈叶平。毛傳之義。本荀子儒效篇也。毛詩由荀子傳之。論語云。君子矜而不爭。羣而不黨。今無良者黨爭而不讓。此黨與彼黨爭。各爲一方而相怨。皆以受爵求安故也。卒之無良。

而比周以鄙者黨中亦爭焉。斯黨愈少矣。斯愈見己之名辱而身危矣。能不亡乎。詩孔疏失之。荀子黨作與。或作譽者謫也。朱子詩傳讀已音以。謂終亦必亡而已矣。蓋詩有倒文之例。今言亡而後已。亦痛辭足以戒也。已止也。或議其不辭非也。唐石經於此作音紀之已。與荀子毛鄭同。今據詩節南山云。式夷式已。釋文云。已毛音以。鄭音紀。由是推之。其字形近似。或異讀之。亦毛鄭例也。詳論語集注述疏荷蕢章。食我讀食若嗣。長丁丈反。

子云。君子貴人而賤己。先人而後己。則民作讓。故稱人之君曰君。自稱其君曰寡君。

鄭氏曰。寡君猶言少德之君。言之謙。

謹案經上文曰。則民有所讓。此文曰。則民作讓。經下文曰。則民興讓。此互文也。猶曰。則民有所作而興讓。蓋以明禮坊之效也。禮說曰。莫尊於君。而已之君。猶爲之謙。則在己者。無所不讓。可知也。爲去聲

釋曰。互文相備。諸經有焉。若書堯典之敘四時。易說卦之敘四方。其例也。

子云。利祿先死者而後生者。則民不偯。先亡者而後存者。則民可以託。詩云。先君之思。以畜寡人。以此坊民。民猶偯死而號無告。偯與背通。畜許竹反。古音許。又反。號平聲。

鄭氏曰。言不偷於死亡。則於生存信。又曰。此衛夫人定姜之詩也。定姜無子。立庶子伋。是爲獻公。畜孝也。獻公無禮。

於定姜。定姜作詩。言獻公當思先君定公。以孝於寡人。又
曰。死者見偕。其家之老弱號呼。稱冤無所告。無理也。衍苦旦反
謹案死亡爲國家死亡者。出行在外曰亡。存在國也。利祿
先之。念死亡者也。方氏曰。若周官云。以其財養死政之老
與其孤。若曲禮云。去國三世。爵祿有列於朝。是也。不偕大
學所謂民不信也。偕與倍通。猶背也。託如論語可以託六
尺之孤之託。惟不偕故可以託。此互文也。詩邶風燕燕篇。
詩序曰。燕燕衛莊姜送歸妾也。鄭箋曰。莊姜無子。陳女戴
嬀生子。名完。莊姜以爲己子。莊公薨。完立。而州吁殺之。戴
嬀於是大歸。莊姜遠送之于野。是也。畜毛詩作勸。說文曰。
勸勉也。從力。冒聲。此古音也。以音近而異文。朱子曰。先君。

莊公也。寡人。莊姜自稱。言以先君之思。勉我使我常念之。是也。畜。古音與好諧聲。孟子曰。畜君者。好君也。今以思先君者。畜而好我焉。

爲國家之爲去聲。北蒲對反。嬌居危反。助許玉反。冒莫報反。

釋曰。襄二十五年左傳云。爲社稷死。爲社稷亡。其言亡也。則曰行乎。蓋出亡也。引周官者。司門職文。此宋方氏慤說也。鄭注以詩爲衛定姜之詩。釋文云。此魯詩也。或曰。蓋韓詩於此與魯詩同。後漢書列傳云。鄭玄少從張恭祖受周官禮記。韓詩其說也。然則毛詩箋在後矣。故鄭禮注言詩者。與詩箋不同。詩燕燕云。遠送于野。則毛詩序其本義也。鄭箋云。戴嬀思先君莊公之故。故將歸猶勸勉寡人以禮義。鄭言以禮義者。於經病添文也。今禮疏之病與箋同。禮

祭統云。孝者。畜也。順於道。不逆於倫。是之謂畜。鄭据以轉注焉。非毛詩義也。鄭注。其家之老弱。號呼稱冤。無所告。此以一句讀之。是順經文者。乃申之曰。無理也。使讀者惻然。長句中至老弱。可微讀之。無理其家。豈不偕乎。

子云。有國家者。貴人而賤祿。則民興讓。尚技而賤車。則民興藝。故君子約言。小人先言。

鄭氏曰。人君貴尚賢者能者。而不吝於頒祿賜車服。則讓道興。賢者能者。人所服也。技。猶藝也。人尚德不尚言。約與先互言耳。君子約則小人多矣。小人先則君子後矣。易曰。君子以多識前言往行。以畜其德。

議音志
行去聲

謹案人者。詩周頌所謂無競維人也。今國家不吝祿以貴

人是所貴者必其人之宜祿也。民敢有爭心貪祿而不讓乎。技者。大學稱秦誓所謂人之有技也。若冉求之藝。有政事才而能知兵者是也。蓋非王制言執技事上而不與士齒者。彼乃曲藝云爾。豈賜車者歟。今國家不吝車以尚技。是所尚者必其技之多藝也。民敢有甘爲車僕而不通六經大藝乎。國家所貴尚者。以爲我國家之祿之車猶未足章其所貴所尚者也。故言其不吝者曰。賤祿賤車。蓋以不吝明不驕也。虞書皋陶謨曰。敷納以言。明庶以功。車服以庸。誰敢不讓。周官鄉大夫曰。攷其德行道藝。皆非徒以言爲貴尚也。則君子小人之言可知矣。陶音遙

釋曰。鄭言讓道興者。統道藝而言也。引無競者。詩周頌烈

文篇文。毛傳云。競彊也。鄭箋云。無彊乎。維得賢人也。得賢人。則國家彊矣。是也。詩大雅抑篇。則用周頌此文。衛武公其於此知貴人乎。論語有人也之稱。明其人足貴焉。禮文王世子篇言曲藝者。則云。以其序謂之郊人。此周書立政篇所謂藝人也。是其人得偏端之曲藝也。詳尚書集注述疏。古稱六經曰六藝。尚書大傳云。學大藝焉。蓋藝莫大於六經。興學者必興藝矣。史記孔子世家稱其教弟子也。曰。身通六藝者七十有二人。此弟子列傳所謂皆異能之士也。或曰。祿與事。禮制也。其不當言賤歟。殆記者之失也。非也。夫各賞者。必以賞驕人。豈非貴祿貴車邪。鴻範八政。二曰貨。漢書所以登食貨志也。曷賤乎。中庸乃曰。賤貨而貴

德。蓋言各有所當也。虞書堯典云。敷奏以言。明試以功。此與皋陶謨不同而同。蓋奏則必納焉。明試者。民衆皆明矣。釋詁云。庶衆也。

子云上酌民言。則下天上施。上不酌民言。則犯也。下不天上施。則亂也。故君子信讓以蒞百姓。則民之報禮重。詩云。先民有言。詢于芻蕘。施如字平聲蒞音利芻初俱反蕘如遙反

鄭氏曰。酌猶取也。取衆民之言以爲政教。則得民心。得民心。則恩澤所加。民受之如天矣。言其尊也。蒞臨也。報禮重者。猶言能死其難。先民謂上古之君也。詢謀也。芻蕘下民之事也。言古之人君將有政教。必謀之於庶民。乃施之。去聲

謹案國語曰。爲民者宣之使言。庶人傳語。而後王斟酌焉。蓋爲益下之施也。易傳言益下者。則以天施象之矣。是下天上施也。犯如孟子稱君子犯義之犯。蓋上不酌度而取民言。則於義有犯焉。而施乎下者。必無天澤。則民亂矣。書曰。罔不配天其澤。言治也。信不欺人。讓不專己。皆能酌也。報者報上施也。詩大雅板篇。詩說。芻求草者。藟采薪者。度徒

洛反

釋曰。經言犯者。鄭注略焉。孔疏以犯爲犯上。於文未適也。民亂蓋因無天澤爾。孔疏以爲有君恩而不領。於義未析也。鄭注云。酌猶取也。鄭以爲酌度而取之也。孔疏云。酌取也。無猶之爲言。失其義矣。詩角弓云。如酌孔取。鄭箋云。孔

取謂度其所勝多少。凡器之孔其量大小不同其義也勝讀平聲。蒞臨詩采芑毛傳義也。民莫重於死故鄭以死明重報焉。尚書說民人也。商頌歌殷先王矣而曰自古在昔先民有作蓋稱古之人君也。詢謀釋詁文鄭以謀申酌施也。引國語者周語文韋注云爲治也。易象傳云益損上益下遂云天施地生其益无方蓋天施則地承其施以生也。坊記所以惟言天施也。釋文施始豉反蓋舊讀去聲今讀如字。平聲以舊讀失成文之聲也。古義不以四聲異也。篇中讀先後字亦然。引書者周書多士文此倒文也。猶曰其澤罔不配天此言殷先王也。

子云善則稱人過則稱己則民不爭善則稱人過則稱己則怨

益亡。詩云。爾卜爾筮。履無咎言。

鄭氏曰。爾。汝也。履。禮也。言汝鄉卜筮。然後與我爲禮。則無咎惡之言矣。言惡在己。彼過淺。鄉去聲

謹案詩。衛風氓篇。爾者。昔男子爾。女子而告之。今女子述其辭也。履。毛詩作體。其義通也。易傳言有禮者曰。故受之以履。禮祭義曰。禮者。履此者也。大戴禮。履此。作體此。禮器曰。禮也者。猶體也。詩言民之爭怨者。女子始自以身從男子。終爲所棄。雖食貧室勞之善。而不見稱。惟歸過於室人。而有咎言。故女子乃爭而怨之曰。鄉者豈不告我云。旣爲爾卜。旣爲爾筮。於禮得吉。無咎言。蓋民之爭怨者。有如此。由其善不稱。人過不稱已也。誤莫辨反。旣爲之爲去聲。

釋曰。履禮。爾雅釋言文。鄭釋此所引詩。反其詩之本義焉。
引詩者。雖斷章取義。當於其詩無相反者。且其曰彼過淺。
豈皆過則稱已乎。詩毛傳云。龜曰卜。蓍曰筮。體兆卦之體。
蓋毛据異文也。其釋體與書金縢說同。惟坊記引詩。子思
子所傳也。詎宜以毛詩易之歟。卜筮爾吉。誘告之虛辭。其
辭云履禮乎。斯所謂非禮之禮也。引大戴禮者。曾子大孝
篇文。此節鄭注。今孔疏無說焉。以上下諸節疏文參之。乃
脫且誤也。

子云善則稱人。過則稱已。則民讓善。詩云。考卜惟王。度是鎬京。
惟龜正之。武王成之。度徒洛反。鎬平老反。

鄭氏曰。度。謀也。鎬京。鎬宮也。言武王卜而謀居此鎬邑。龜

則出吉兆正之。武王築成之。此臣歸美於君。

謹案詩大雅文王有聲篇。考猶稽也。度毛詩作宅。蓋宅則度之。此音近而義相生。故異文焉。若今文尙書宅皆作度也。鎬京猶洛師也。京大也。猶師衆也。春秋傳所謂衆大之辭也。詩自成王而言。亦子歸美於親。臣子一例也。蓋人莫尊於君親。此從上節言凡人相與者而遞進之。以起下二節君親之義。

釋曰。考卜者。鴻範之稽疑也。故詩毛傳云。考猶稽也。度謀。釋詁文。鄭稱鎬宮。蓋猶詩京室然。非衆大之辭也。引春秋傳者。桓九年公羊傳文。鄭釋詩惟自臣而言。則經之爲文偏矣。孔疏申說亦不然。僖元年公羊傳云。臣子一例也。蓋

此皆例同。今陝西行省西安府長安縣古鎬京在焉。

子云善則稱君。過則稱己。則民作忠。君陳曰。爾有嘉謀嘉猷。入告爾君于內。女乃順之于外。曰。此謀此猷。惟我君之德。於乎。是惟良顯哉。

女與汝通於平猶嗚呼

鄭氏曰。君陳。蓋周公之子。伯禽弟也。名篇在尙書。今亡。嘉善也。猷。道也。於乎。是惟良顯哉。美君之德。

謹案爾雅曰。元良。首也。蓋君以良爲德。今稱君良德之顯焉。或曰。此言良臣也。董子引此而說之曰。古之良大夫。其事君皆若是。亦一義也。書序曰。周公既沒。命君陳分正東郊。成周。作君陳。蓋正長也。成周在洛之東。故繫之曰東郊。成周之正。王官之長也。此君陳奉王命爲成周之正而告。

庶邦之臣者歟。若酒誥。庶邦之臣也。故其辭稱爾君焉。如告庶官而入告天子。則當皆言我君矣。今告庶邦之臣。則曰爾君。庶邦之臣自稱。則曰我君。蓋天子君天下。諸侯君其國也。此音秘長

丁丈反

釋曰。鄭意君陳爲周公之子。鄭以此篇亡而意言之爾。今無以見其必爲周公之子也。夫周公旣沒。三年喪畢。然後君陳可正成周。則成周無正不已久乎。且書序何以不言喪畢乎。王都之官。當喪畢而就之也。蓋異於諸侯自君其國者矣。東晉僞古文尙書。孔疏不察焉。而反据之以譏鄭。則妄也。經引君陳爲人臣愛君之辭。今僞君陳。則竄而爲人君告臣也。何其導諛乎。凡辯僞古文者。詳尙書集注述

疏釋詁云。嘉善也。絲道也。猷與絲通。董子說見春秋繁露
竹林篇。詩雨無正箋云。正長也。尚書說云。愆戒也。

子云善則稱親。過則稱己。則民作孝。大誓曰。予克紂。非予武。惟
朕文考無罪。紂克予。非朕文考有罪。惟予小子無良。大音泰

鄭氏曰。大誓尚書篇名。克勝也。非予武。非我武功也。文考
文王也。無罪則言有德也。無良無功善也。此武王誓衆以
伐紂之辭也。今大誓無此章。則其篇散亡。

謹案予我也。紂殷王名。所謂獨夫紂也。朕亦我也。古之通
稱。朕與予變文者。迭稱故也。生曰父。死曰考。文考以諡繫
稱也。

釋曰。釋詁云。勝克也。則克亦勝也。鄭轉注焉。釋詁云。予朕。

我也。天子稱朕。秦以前未有此制也。釋考義者。曲禮文。周書本典篇曰文考。曰武考。皆稱其諡也。或曰文考。文德之考。通稱也。非也。鄭謂今大誓無此章。此鄭據所見古文本也。亦據今文本與古文所同者也。孔疏乃謂鄭不見古文。孔據僞古文云爾。大誓逸文。今猶有可攷者。

子云。君子弛其親之過而敬其美。論語曰。三年無改於父之道。可謂孝矣。高宗云。三年其惟不言。言乃謹。弛式氏反。謹音敬。

鄭氏曰。弛猶棄忘也。孝子不藏記父母之過。又曰。三年無改於父之道。不以己善駁親之過。高宗殷王武丁也。名篇在尙書。三年不言。有父小乙喪之時。謹當爲歡聲之誤也。其旣言。天下皆歡喜。樂其政教也。駁邦角反。

謹案禮說曰。易稱榦父之蠱。斯蓋前愆也。則親之過皆棄忘焉。三年不言者。尙書大傳謂未嘗言國事也。謹古通歡。鄭釋檀弓引此書者曰。謹喜說也。今此當同。三年喪畢。言乃喜說。此以知三年不遽改。而改於其後者。皆善爲之也。

蠱音古
說音悅

釋曰。釋詁云。弛易也。郭注云。相延易。釋文。易以豉反。蓋凡事之相延易者。漸棄忘而不覺矣。商書有高宗之訓篇。鄭書注謂其篇亡。是也。今僞者竄其辭於僞說命焉。

子云。從命不忿。微諫不倦。勞而不怨。可謂孝矣。詩云。孝子不匱。
匱其愧反

鄭氏曰。微諫不倦者。子於父母尙和順。不用謬謬。論語曰。

事父母幾諫。見志不從。又敬不違。內則曰。父母有過。下氣怡色。柔聲以諫。諫若不入。起敬起孝。說則復諫。此所謂不倦。匱乏也。孝子無乏止之時。

詩五各反幾平聲說音悅復扶又反

謹案從命不忿者。此言思諫時。知命不可從。而暫從命者也。此從命乃不得已。故以不忿明之。曾子曰。諫而不逆。又曰。諫而不用。行之如由己。明乎暫從命不逆。而任過於己焉。曾子曰。士之孝也。以德從命。其從命之常。豈惟不忿已乎。勞而不怨者。苦之不以爲苦也。內則曰。父母怒。不說而撻之。流血。不敢疾怨。蓋與論語稱勞而不怨者同。詩大雅既醉篇。毛傳曰。賁。竭也。謂行有不得而竭極也。內則曰。與其得罪於鄉黨。州閭。寧孰諫。孝經曰。父有爭子。則身不陷。

於不義。夫無不義則無得罪。安見行有不得者。故孝子不

竭極焉。曾子曰。大孝不匱。

孰古通孰爭去聲

釋曰。引不逆者。大戴禮曾子大孝篇文。下引大孝者同。小戴禮祭義有取焉。引不用者。曾子事父母篇文。引以德者。曾子本孝篇文。皆列大戴禮曾子十篇也。或曰。忿當作怠。此破字釋之。非經原文也。曾子立孝篇云。微諫不倦。聽從而怠。或曰。人子聽從。所謂諫而不逆也。惟不怠於諫焉。或曰。父母聽從其諫。人子不因其聽從愛己遂以怠也。彼欲破字者。將由前一說釋之歟。將別爲以德從命者言不怠歟。皆未察乎不忿之義也。史記貨殖傳引周書。則有匱與乏相因之說焉。左傳於成九年稱代匱。於成二年稱承

乏。左傳說以之互訓矣。此匱乏爲乏止也。惟匱竭爲竭極者。鄭箋亦從毛傳而言之。蓋詩本義也。其義尤洽也。史記商君傳云。千人之諾諾。不如一士之謬謬。謂士直言也。孰古孰字。孰諫者。如物之待孰。宜不息亦不急也。爭猶諍也。卽諫也。鄭注謬謬釋文作鄂鄂。與曾子立事篇文同。

子云。睦於父母之黨。可謂孝矣。故君子因睦以合族。詩云。此令兄弟。綽綽有裕。不令兄弟。交相爲瘡。綽音卓瘡以主反

鄭氏曰。睦厚也。黨謂親也。合族謂與族人燕與族人食。令善也。綽綽寬裕貌。交猶更也。瘡病也。更平聲

謹案族同姓九族也。爾雅釋親。首曰宗族。次曰母黨。而不稱母族焉。上文言父母之黨。而此惟言族者。睦於父黨。則

母黨可推也。大傳曰：同姓從宗，合族屬。詩：小雅角弓篇。

釋曰：說文云：睦，敬和也。夫敬以和者，無不厚焉。古尚書說

九族者，從高祖至玄孫，皆同姓。鄭駁許氏異義者，從古說

也。禮文王世子云：若公與族燕，則公與父兄齒。族食，世降

一等。禮大傳言合族者云：綴之以食而弗殊。鄭注：揭焉，令

善，喻病。釋詁文：孟子云：豈不綽綽然有餘裕哉？言其寬也。

子云：於父之執，可以乘其車，不可以衣其衣。君子以廣孝也。上

衣去聲

鄭氏曰：父之執與父執志同者也。可以乘其車，車於身差

遠也。謂今與己位等。差初賣反

謹案：曲禮曰：見父之執，不謂之進，不敢進；不謂之退，不敢

退。不問不敢對。此孝子之行也。蓋父之執友。非僚友交遊比矣。故孝子敬之如此。今雖與已位等。不敢以服章之同而忘敬焉。孝經說有廣敬之義。皆廣孝而推之矣。行去聲。僚與寮通。

釋曰。差遠猶較遠。孔疏云。若尊卑懸絕。不可傳通衣服。故知與已位等。此申鄭意焉。曲禮云。僚友稱其弟也。執友稱其仁也。交遊稱其信也。蓋三者惟執友則志同矣。服章詳書皋陶謨。

子云。小人皆能養其親。君子不敬。何以辨。養去聲。

鄭氏曰。辨別也。

謹案曾子曰。君子之孝也。忠愛以敬。又曰。盡力無禮。則小

人也。孝經曰：禮者敬而已矣。故曾子曰：養可能也，敬爲難。敬可能也，安爲難。安可能也，卒爲難。君子必勉其難，豈有餘於敬之外乎？安者敬以安也，卒者敬以安而能終也。釋曰：別如論語不敬何以別乎之別，言當明辨之也。引君子小人者，大戴禮曾子立孝篇文，引爲難者，禮祭義文。曾子大孝篇略同。

子云：父子不同位，以厚敬也。書云：厥辟不辟，忝厥祖。

辟音壁

鄭氏曰：同位，尊卑等爲其相襲。又曰：厥其也，辟君也。忝辱也。爲君不君，與臣子相襲，則辱先祖矣。君父之道宜尊嚴，爲其之爲去聲，褻息列反。

謹案孝經曰：父子之道，天性也。君臣之義也。故曰：君親臨

之明乎父尊子卑。猶君尊臣卑。其位則以尊臨卑而不同也。書逸書。

釋曰。厥其忝辱。釋言文。辟君。釋詁文。書爲逸書者。鄭不知其篇名。春秋繁露引之。亦無篇名也。今僞大甲襲之爾。子云。父母在。不稱老。言孝不言慈。閨門之內。戲而不歎。君子以此坊民。民猶薄於孝而厚於慈。

鄭氏曰。孝上施言慈則嫌下流也。戲謂孺子言笑者也。孟子曰。舜年五十而不失其孺子之心。歎謂有憂戚之聲也。謹案曲禮曰。恆言不稱老。謂爲人子者也。孝經曰。慈愛恭敬。安親揚名。其言慈者慈於親也。言慈卽言孝也。若內則言事父母者慈以旨甘也。孝經固不言慈子也。列女傳曰。

老萊子孝養二親。行年七十。嬰兒自娛。著五采衣。蓋戲以娛親者有然。曾子曰。孝子唯巧變。故父母安之。今經言戲而不歎。其巧變之類也。著直略反

釋曰。鄭引孟子文。蓋如古槩。枯引經法。約數章之義而引之。故其文不同而義同。或以爲孟子逸篇。非也。引巧變者。曾子事父母篇文。巧猶善也。孔疏本經文。民猶薄於孝。今據焉。唐石經作民猶有薄於孝。今攷篇中諸文。猶下有字。或用。或不用。二者皆通例也。

子云。長民者。朝廷敬老。則民作孝。長丁丈反

鄭氏曰。長民。謂天子諸侯也。

謹案王制曰。八十杖於朝。七十不俟朝。祭義曰。七十者不

有大故不入朝。若有大故而入。君必與之揖讓而后及爵者。是朝廷敬老也。朝廷貴爵。且必敬老。則天下無不敬老者矣。

釋曰。不俟朝者。王制注云。大夫士之老者。揖君則退。是也。若有大故而入者。祭義注云。謂致仕在家者是也。或曰。凡朝命治事之所。古皆通曰朝廷。若孟子於公行子家而稱朝廷也。然自天子諸侯之朝而言。尤見其敬老之至焉。行讀若杭。

子云。祭祀之有尸也。宗廟之有主也。示民有事也。脩宗廟。敬祀事。教民追孝也。以此坊民。民猶忘其親。

鄭氏曰。有事。有所尊事也。

謹案尸。象神者也。曲禮稱孫爲王父尸。古禮有然。主依神者也。公羊傳曰。虞主用桑。練主用栗。用栗者藏主也。蓋以藏於宗廟焉。由此經言之。凡宗廟皆有主矣。今禮亦然。儀禮少牢饋食禮曰。用薦歲事于皇祖伯某。以某妃配某氏。此大夫祭稱也。則主稱可推矣。方氏曰。追孝者。祭統所謂追養繼孝也。少去聲。食音嗣。妃滂佩反。

釋曰。釋親云。父之考爲王父。引公羊傳者。文二年文。何注云。主狀正方。穿中央。達四方。天子長尺二寸。諸侯長一尺。是也。許氏愼。謂大夫士無主。鄭氏說同。徐氏邈駁之。禮家說各執焉。奚不察於坊記此經也。禮說。伯某字也。其仲叔季亦然。某妃。伯某妻也。合食曰配。某氏。繫所配者氏也。

子云。敬則用祭器。故君子不以非廢禮。不以美沒禮。故食禮。主人親饋則客祭。主人不親饋則客不祭。故君子苟無禮。雖美不食焉。易曰。東鄰殺牛。不如西鄰之禴祭。寔受其福。詩云。既醉以酒。既飽以德。以此示民。民猶爭利而忘義。非音匪。食禮之食音嗣。禴音藥。寔與實通。

鄭氏曰。祭器簋豆簠鉶之屬也。有敬事於賓客則用之。謂饗食也。盤孟之屬爲燕器。君子不可以其薄不及禮而不行禮。亦不可以其美過禮而去禮。禮主敬。廢滅之是不敬。東鄰謂紂國中也。西鄰謂文王國中也。易辭在既濟。既濟離下坎上。離爲牛。坎爲豕。西鄰禴祭則用豕與。言殺牛而凶。不如殺豕受福。喻奢而慢。不如儉而敬也。春秋傳曰。黍稷非馨。明德惟馨。信矣。引詩者。言君子饗燕。非專爲酒殽。

亦以觀威儀。講德美。

簋音軌。鉶戶經反。饗食之。食音嗣。孟音予。與平聲。

謹案易既濟九五爻辭。此其卦離下坎上而又互焉。鄭氏周易注曰。既濟互坎互離。離爲日。坎爲月。日出東方。東鄰象也。月出西方。西鄰象也。禴夏祭之名是也。蓋九五坎體而互離。離主夏。萬物由是長。故夏禴以薄爲時義焉。六二離體而互坎。離得坤中爲牛。坎爲血。此殺牛盛禮。非夏禴時所宜之義。故象曰。東鄰殺牛。不如西鄰之時也。天下大難既濟之時。位九五而主祭者。禮從儉薄。以叶時宜。如夏禴之時義。乃爲福也。詩大雅既醉篇。經於此節。獨言以此示民者。明乎上下文言。以此坊民。亦皆示民也。互相備也。

長丁丈反。難去聲。

釋曰。祭器。籩以竹。豆以木。簋黍稷器。銅羹器。論語馬注云。菲薄也。詩瓠葉序云。古之人不以微薄廢禮焉。客祭謂祭始爲飲食者。周易鄭注見坊記此節疏及詩天保疏釋文。寔易作實。蓋義同。經曰。以此示民。禮家說不承經首節言坊者以貫之。而謂此不言坊民也。失之矣。瓠戶故反。

子云。七日戒。三日齋。承一人焉。以爲尸。過之者趨走。以教敬也。醴酒在室。醕酒在堂。澄酒在下。示民不淫也。尸飲三。衆賓飲一。示民有上下也。因其酒肉。聚其宗族。以教民睦也。故堂上觀乎室。堂下觀乎上。詩云。禮儀卒度。笑語卒獲。齊側皆反醕音體度如字

鄭氏曰。戒。謂散齋也。承。猶事也。淫。猶貪也。澄酒。清酒也。三酒。尚質。不尚味。上下。猶尊卑也。主人主婦上賓獻尸。乃後

主人降洗爵獻賓。又曰。祭有酒肉。羣昭羣穆皆至而獻醕。之。咸有薦俎。堂上堂下言觀者。謂祭時肅敬之威儀也。卒。盡也。獲得也。言在廟中者不失其禮儀。皆歡喜得其節也。

醕與酬通

謹案周官酒正有醴齊醕齊之名。今日酒者通稱也。詩小

雅楚茨篇。

齊才細反。茨徐容反。

釋曰。說文云。承奉也。謂奉事焉。鄭言獻尸。獻賓及薦俎者。約儀禮特性饋食禮而言也。釋詁云。卒。終也。終則盡矣。醕。齊從禮運鄭注引文。周官今本作緹齊。酒成色紅也。

子云。賓禮每進以讓。喪禮每加以遠。浴於中霤。飯於牖下。小斂於戶內。大斂於阼。殯於客位。祖於庭。葬於墓。所以示遠也。殷人

帛於壙。周人帛於家。示民不僭也。子云。死。民之卒事也。吾從周。以此坊民。諸侯猶有薨而不葬者。雷力救反。飯上聲。賓去聲。壙音曠。

鄭氏曰。遠之所以崇敬也。阼。或爲堂。旣葬。哀而哭踊。於是

帛之。從周。周於送死尤備也。勇音

謹案。飯者。不忍虛其口也。檀弓曰。飯用米貝。祖者。及至葬

而祖奠也。猶生時祖餞。以祖爲行之始也。室有兩雷。故謂

中室曰中雷。牖下。南牖之下。阼。東階也。壙。謂襄土之域。不

葬。謂不會葬也。明其不帛也。此承帛之示民不僭而言。春

秋。昭公六年。春。正月。葬秦景公。左傳曰。大夫如秦葬景公。

禮也。然春秋時。諸侯以侵伐故。則有薨而不葬者。斯僭之

矣。寔克反。

釋曰。喪禮說。踊跳躍也。凡言室制者。參朱子儀禮釋宮而攷焉。周官說。窆穿墻也。曲禮云。天子死曰崩。諸侯曰薨。春秋於諸侯薨而會葬者。皆書曰葬某公。左傳則於昭六年明其例焉。若夫春秋以隱公之弑也。惟書曰公薨。左傳云。不書葬。不成喪也。此不書葬。非不葬也。且坊記下文又別言子弑其父者。故知此爲不會葬也。

子云。升自客階。受弔於賓位。教民追孝也。未沒喪。不稱君。示民不爭也。故魯春秋記晉喪曰。弑其君之子奚齊。及其君卓。以此坊民。子猶有弑其父者。弑不作殺

鄭氏曰。升自客階。受弔於賓位。謂反哭時也。既葬矣。猶不由阼階。不忍卽父位也。沒終也。春秋傳曰。諸侯於其封內

三年稱子。至其臣子。踰年則謂之君矣。奚齊與卓子皆獻公之子也。獻公卒。其年奚齊弑。明年而卓子弑矣。弑父不子之甚。

謹案周官大行人稱大賓。小行人稱小客。今言客又言賓。互文也。下殺上曰弑。未踰年之君稱曰君之子。殺之與弑君同。故皆書曰弑。著其罪也。

釋曰。禮說阼階在東。主位也。客階在西。釋詁云。卒終也。沒猶卒也。引春秋傳者。文九年公羊傳文。凡言賓客。散文則通對文則異。今以對文而互言爾。書顧命有賓階之稱。經上文曰。民猶得同姓以弑其君。陸氏本作以殺。釋文殺音試。本又作弑。經此文曰。弑其君之子奚齊。及其君卓。陸氏

本作殺其。釋文。殺音試。注及下同。一音如字。經此文曰。子
猶有弑其父者。陸氏本亦作殺其。故先曰下同也。蓋本又
作弑。以釋文上下推之。經文當一例焉。唐石經坊記初刻
云。弑其君之子奚齊。及其君卓。此於春秋叶矣。其後改刻
作殺其。則惑也。春秋僖公九年冬。晉里克弑其君之子奚
齊。十年春。晉里克弑其君卓子。此公羊所傳經也。左氏殺
梁皆作殺其君之子。異於書弑之文。譌也。卓子。左氏殺梁
無子字。與坊記稱卓同。

子云。孝以事君。弟以事長。示民不貳也。故君子有君不謀仕。惟
卜之日稱二君。喪父三年。喪君三年。示民不疑也。父母在。不敢
有其身。不敢私其財。示民有上下也。故天子四海之內無客禮。

莫敢爲主焉。故君適其臣。升自阼階。卽位於堂。示民不敢有其室也。父母在。饋獻不及車馬。示民不敢專也。以此坊民。民猶忘其親而貳其君。弟音悌長丁丈反喪平聲

鄭氏曰。不貳不自貳於尊者也。自貳謂若鄭叔段者也。君子有君謂君之子父在者也。不謀仕嫌遲爲政也。卜之曰。謂君有故而爲之卜也。二當爲貳。惟卜之時。辭得曰君之貳某爾。晉惠公獲於秦。命其大夫歸擇立君。曰。其卜貳圉也。不疑不疑於君之尊也。君無骨肉之親。不重其服。至尊不明。又曰。父母在身及財皆當統於父母也。有猶專也。臣亦統於君。車馬家物之重者。而爲讀爲去聲圉音語

謹案孝經曰。君子之事親孝。故忠可移於君。事兄悌。故順

可移於長。蓋移以事之也。弟猶悌也。詩言周之詒謀者曰。武王豈不仕。毛傳曰。仕事也。然則謀仕者。謀政事也。喪禮。子爲父。臣爲君。皆斬衰三年。爲去聲。衰七雷反。

釋曰。鄭注云。不謀仕。嫌遲爲政也。鄭据晉語言之。蓋驪姬譖太子申生者。用此嫌矣。其譖於獻公曰。君盍老而授之政。彼得政而行其欲。得其所索。乃其釋君。蓋嫌遲爲政也。釋謂舍之不害也。遲讀如字。釋文。遲直志反。其讀失之。非鄭意也。襄二十六年左傳。言宋伊戾誣太子痤者。曰。欲速。亦鄭所据也。引詩者。文王有聲文。毛傳釋仕者。古訓也。表記引此詩。鄭注亦云。仕之言事也。今謂不謀政事焉。孔疏以仕官言之。非也。或以此爲君子筮仕歟。安見始謀仕者。

必二君乎。且卜後事君。是有君而謀仕矣。經不當云有君不謀他仕乎。鄭以二爲貳。据上下文皆作貳焉。貳因二而名。易言二簋者。則曰簋貳。此所由致誤爾。晉語云。太子君之貳也。鄭叔段見左傳隱元年。晉惠公見左傳僖十五年。子云。禮之先幣帛也。欲民之先事而後祿也。先財而後禮。則民利無辭而行情。則民爭。故君子於有饋者弗能見。則不視其饋。易曰。不耕穫。不菑畲。凶。以此坊民。民猶貴祿而賤行。菑音縉。畲音余。賤行去聲。

鄭氏曰。此禮謂所執之贄以見者也。旣相見。乃奉幣帛以脩好也。或云。禮之先辭而後幣帛。財幣帛也。利猶貪也。辭辭讓也。情王利欲也。饋遺也。不能見。謂有疾也。不視猶不

內也。易言必先種之乃得穫。若先菑乃得畬也。安有無事而取利者乎。田一歲曰菑。二歲曰畬。三歲曰新田。行猶事也。言務得其祿。不務其事。遺于季反。內音納。

謹案禮說曰。辭者行禮之辭。若孟子稱辭曰餽。辭曰聞戒。蓋禮皆有處也。無辭而行情者。若孟子稱無處而餽之。是貨之也。由是民爭迎合矣。餽與饋通。易蓋易古本異文。或曰。易无妄六二爻辭曰。不耕穫。不菑畬。凶。則利有攸往。今本脫凶字焉。象傳曰。天下雷行。物與无妄。先王以茂對時育萬物。今以卦位三才言之。二在地上。所謂在田也。其象耕穫於菑畬也。此對天下雷行之時。震東主春。動得乾陽。宜往外東作。如謂不耕而穫。不耕者乃不菑而畬。是不

往作亦得也。是妄也。凶也。安見偶有妄得爲既富之吉乎。故象傳曰。不耕穫。未富也。惟六二中正之陰。往外而應九五中正之陽。動作因天時。明彼不往作之凶。則利有所往。故序卦曰。復則不妄矣。六二陰柔。靜待於內。其中慮與中孚之實。懼其不往外而有妄。故先言凶以戒之。此言凶而有則之爲言者。其例猶蠱則飭也。而子思子節引焉。今宜會通矣。處上聲 蠱音古

釋曰。漢志云。劉向以中古文易經校施孟梁丘經。或脫去无咎悔亡。唯費氏經與古文同。由是推之。今本易從費氏經者。既與古文同。而无妄六二爻辭脫凶字。何也。其脫於先秦古文者乎。呂氏春秋貴因篇言因紂亂者云。適合武

王不耕而穫。此用易文也。其時所見本必已脫內字焉。如非然也。豈謂武王爲凶乎。漢志於中古文言中者。猶今言內府也。爾雅釋地云。田一歲曰菑。二歲曰新田。三歲曰畲。詩采芑毛傳同。禮疏據之。謂鄭注誤焉。或曰。說文云。畲。二歲治田也。易无妄虞氏注云。田在初。一歲曰菑。在二。二歲曰畲。蓋與鄭注同。其古本爾雅有異文歟。堯典云。平秩東作。蓋仲春也。

子云。君子不盡利以遺民。詩云。彼有遺秉。此有不斂穧。伊寡婦之利。故君子仕則不稼。田則不漁。食時不力珍。大夫不坐羊。士不坐犬。詩云。采芣采芣。無以下體。德音莫違。及爾同死。以此坊民。民猶忘義而爭利以亡其身。

穧才計反
菲芳尾反

鄭氏曰。君子不與民爭利也。詩言穫者之遺餘。摭拾所以爲利。食時謂食四時之膳也。力猶務也。天子諸侯有秩膳。古者殺牲。食其肉。坐其皮。不坐犬羊。是無故不殺之。葍蔓菁也。陳宋之間謂之葍。菲當類也。下體謂其根也。采葍菲之菜者。采其葉而可食。無以其根美則并取之。苦則棄之。并取之。是盡利也。此詩乃故親今疏者。言人之交。當如采葍采菲。取一善而已。君子不求備於一人。能如此。則德美之音不離。合名我願與汝同死矣。論語曰。故舊無大故。則不棄也。

摭居運反。當離力智反。

謹案詩小雅大田篇。詩說秉禾把也。穊謂秉之齊束者。毛詩作此有滯穗。蓋與坊記互異其文。而詩義皆同。玉藻云。

犬羊之裘不裼。謂庶人無文飾也。如大夫坐羊皮。士坐犬皮。則無遺利於裘用犬羊之民矣。詩邶風谷風篇。凡盡利而采之無遺者。必至求備而棄之不采。其求備也。卽其盡利之心。所因以求之也。求不能備。斯不能遂其采之無遺者矣。有不貪戾而終棄之乎。非其忘義而爭利乎。殉利死爭。以亡其身。安聞德音。其願與之同死者何人也。邶音蒲對反。殉徐閏反。

釋曰。春秋繁露制度篇。引詩大田此文。與坊記同。亦異毛詩也。禮內則稱春膳膏臠。夏膳膏臊。秋膳膏腥。冬膳膏膾。蓋四時之膳也。周官庖人。臠作香。內則秩膳注云。秩常也。玉藻云。大夫無故不殺羊。士無故不殺犬豕。鄭注用之。惟

有故而殺。又何爲不坐邪。鄭於義未悉也。詩谷風鄭箋釋
葑菲云。此二菜者。皆上下可食。然而其根有美時。有惡時。
是也。禮疏云。根美無并取其根。不盡利也。根惡無并棄其
葉。不求備也。疏以爲鄭前釋不盡利。正合記文。後釋不求
備。與記意稍乖。朱子從疏說。亦謂此只重不盡利也。斯未
審。記意當二者相因歟。谷風之詩曰。宴爾新昏。不我屑以。
其言夫婦也明矣。故齊魯韓三家谷風遺說。皆自夫婦言
之。與毛詩說同。禮疏謂鄭注記時未見毛傳。不知夫婦相
怨。謂交友相與。所以云故親今疏。此失鄭意也。鄭注言人
之交者。統凡有人之交而言。則夫婦在其中矣。曲禮言男
女者云。非受幣不交不親。猶詩關雎云。琴瑟友之。故記下

文云男女無媒不交。鄭注酌焉。鄭以記引此詩非專言夫婦也。故統言之。蓋善於經矣。

子云。夫禮坊民所淫。章民之別。使民無嫌。以爲民紀者也。故男女無媒不交。無幣不相見。恐男女之無別也。以此坊民。民猶有自獻其身。詩云。伐柯如之何。匪斧不克。取妻如之何。匪媒不得。藝麻如之何。橫從其畝。取妻如之何。必告父母。

取與娶通。從子容反。藝與藝通。

告音谷

鄭氏曰。淫猶貪也。章明也。嫌嫌疑也。重男女之會。所以遠別之於禽獸也。有幣者必有媒。有媒者不必有幣。仲春之月。會男女之時。不必待幣也。獻猶進也。伐柯伐木以爲柯也。克能也。藝猶樹也。橫從橫行治其田也。言取妻之法必

有媒如伐柯之必須斧也。取妻之道必告父母如樹麻當

先易治其田。

鄭讀從如字
易以智反

謹案紀理也。詩齊風南山篇伐柯毛詩作析薪。今坊記稱伐柯其義猶幽風然。詩說東西曰橫南北曰從。經言坊民而民踰坊者皆在所引文之下。此獨在所引文之上者明其餘諸文亦宜上下互推也。其他又有不言以此坊民者省文也。以其爲坊民可互明也。

幽音
彬

釋曰。詩假樂云之綱之紀。鄭箋云謂立法度以理治之也。白虎通云紀者理也。周官媒氏云中春之月合會男女於是時也。奔者不禁中與仲通。禮說云奔非淫奔也。內則云聘則爲妻奔則爲妾。蓋奔者有媒而納徵之幣或不足焉。

橫毛詩作衡。蓋古通也。從詩釋文引韓詩作由。遂引韓詩說云。東西耕曰橫。南北耕曰由。則由亦從也。鄭讀從如字。釋詁由從義同。詩蕩毛傳由行義同。鄭釋橫從爲橫行。本韓詩而變其說也。豈叶乎。或曰。橫行亦作遊行。釋文可攷焉。蓋遊行者。或橫或從也。克能釋言文經曰。以此坊民。民猶有自獻其身。陳氏澣謂此經文當在所引文之下。蓋以類推之。未察於文法之變也。

子云。取妻不取同姓。以厚別也。故買妾不知其姓。則卜之。以此坊民。魯春秋猶去夫人之姓曰吳。其死曰孟子卒。取皆讀娶去上聲

鄭氏曰。厚猶遠也。妾言買者。賤之也。士庶之妾。恒多凡庸。有不知其姓者。吳大伯之後。魯同姓也。昭公取焉。去姬曰。

吳而已至其死亦略云孟子卒不書夫人某氏薨孟子蓋

其且字

太音泰

謹案厚別謂加意別焉子宋姓魯昭諱孟姬爲孟子蓋魯昭夫人之至也以春秋凡書夫人者例之當曰夫人姬氏至自吳魯春秋難乎書同姓則書曰夫人至自吳而姬氏不書去姓也魯猶秉周禮今於史文之直見之故子思子稱焉若孔子所脩者又削史文惟曰哀公十有二年夏五月甲辰孟子卒此所謂春秋之稱微而顯也如屬乎他夫人之辭而比其事焉則其爲取同姓可知矣

有音又屬音屬比毗志反

釋曰鄭注別本云妾言買者以其賤同之於衆物也今不從別本而從內府定本焉說文云且薦也蓋承藉而薦之

也禮說云人之字以敬其名者則以字薦之儀禮鄭注每云且字也或釋坊記此注云聊且字之非也猶秉周禮閔元年左傳文微而顯成十四年左傳文禮經解云屬辭比事春秋教也屬謂屬合比謂比次

子云禮非祭男女不交爵以此坊民陽侯猶般繆侯而竊其夫人故大饗廢夫人之禮繆與穆通

鄭氏曰交爵謂相獻酢陽侯繆侯同姓也以貪夫人之色至般君而立其國未聞大饗饗諸侯來朝者也夫人之禮使人攝酢才洛反朝音潮

謹案陽國名春秋曰齊人遷陽繆古通穆諡也淮南子繆作蓼高氏曰蓼侯皋陶之後是也以書法參之經稱二侯

當皆以國書於其夫人而曰竊明其殺必爲陰謀矣。大饗再裸。夫人拜送爵。無賓酢夫人者。不交爵也。周官大行人曰。王禮再裸而酢。此王饗禮上公。后於再裸拜送爵也。鄭司農曰。而酢報飲王也。蓋非賓交爵酢后焉。則王饗同姓者可推也。則諸侯同姓相饗者亦可推也。惟拜送爵時得見夫人。乃有陽侯之謀。由是拜送爵禮廢。則使人攝矣。夢

鳥反裸
古亂反

釋曰。儀禮特牲饋食禮。此士之祭禮也。而其上以此推矣。其禮主婦獻尸。尸酢主婦。所謂交爵也。周官內宰云。凡賓客之裸。獻瑤爵皆贊。此贊后再裸亞獻而用瑤爵之禮也。彼注云。謂王同姓及二王之後來朝覲爲賓客者。是也。二

王之後用上公禮也。諸侯有相朝之禮，主國亦曰來朝，遂相饗焉。周官大宗伯云：大賓客則攝而載裸，此攝酌禮也。以君無酌臣也，非因廢禮而攝也。其因廢禮而攝者，亦卽此以明歟。經曰：禮非祭，男女不交爵，而孔疏言大饗亦交爵也，則經文上下何以能貫乎？諸家不察孔疏之非，而反疑經者多，何邪？孔疏言饗異姓，則使人攝者，亦非也。饗異姓，則無夫人之禮，何以攝爲？大宗伯所謂攝者，非以其異姓也，皆失鄭意也。引春秋者，閔二年文：陽國近齊，故遷之。繆周官內宰注引作穆，蓋古通也。孔疏言陽繆是謚，夫繆謚然矣。謚法有煬無陽，豈叶乎？孔疏言取其夫人，襲其國而自立，則經何以言竊乎？引淮南子者，汜論篇文：文五年

左傳云。楚子燮滅蓼。滅文仲曰。皋陶庭堅不祀。忽諸。淮南子高誘注。据焉。蓼國近楚。故滅之。若夫陽侯殺蓼侯。其時蓼又立君。故坊記不言滅也。汎與汎通。

子云。寡婦之子。不有見焉。則弗友也。君子以辟遠也。故朋友之交。主人不在。不有大故。則不入其門。以此坊民。民猶以色厚於德。見賢通遠反辟與德。見賢通遠去聲。

鄭氏曰。有見。謂睹其材藝也。同志爲友。大故喪病也。睹與觀通。謹案。友者。執友也。其執志同。是其所親也。辟遠者。去嫌疑也。朋友之交者。以朋兼交遊。別執友而備言所交也。

釋曰。睹。猶覩也。其有著見。則覩之矣。或曰。見如論語從者見之之見。謂其親戚與俱見者。非也。有與俱見。遂無嫌疑。

乎。從讀去聲。周官大司徒云。以本俗六安萬民。四曰聯師。儒。五曰聯朋友。鄭彼注云。同師曰朋。同志曰友。蓋鄭對師儒而言也。論語鄭注有其文。同師作同門。亦斯義焉。鄭坊記注。不以師門釋朋者。明朋非專在師門也。當以交遊統稱朋矣。詩常棣云。每有良朋。又云。不如友生。彼朋亦友也。是通言矣。諸經亦或然。今坊記此文必別言者。以上言友。下言朋友之交故也。

子云。好德如好色。諸侯不下漁色。故君子遠色以爲民紀。故男女授受不親。御婦人則進左手。姑姊妹女子子。已嫁而反。男子不與同席而坐。寡婦不夜哭。婦人疾。問之不問其疾。以此坊民。民猶淫佚而亂於族。

好遠皆去聲佚音逸

鄭氏曰。好德如好色。此句似不足。論語曰。未見好德如好色。疾時人厚於色之甚而薄於德也。不下漁色。謂不內取於國中也。內取國中。爲下漁色。昏禮始納采。謂采擇其可者。國君而內取。象捕魚然。中網取之。是無所擇也。不親者。不以手相與也。內則曰。非祭非喪。不相授器。其相授則女受以篚。其無篚則皆坐奠之而後取之。御者在右。前左手則身微背之也。女子十年不出。嫁及成人。可以出矣。猶不與男子共席而坐。遠別也。不夜哭。嫌思人道也。不問其疾。嫌媚略之也。問增損而已。亂族。犯非妃匹也。取與娶通中網讀中去聲

遠同上妃古通配

謹案好德如好色。猶大學言明德誠意者如好好色也。諸

侯不下漁色。謂當好德焉。後世之制。官吏毋得以部民女子爲妻妾。不下漁色也。女子子者。明此女子爲己子也。反謂歸寧父母時也。魯季氏之婦敬姜朝哭其夫穆伯。孔子稱其知禮矣。淫佚者淫以佚也。佚者逸也。如好好色下好上聲

釋曰。經稱好德如好色。鄭以句似不足疑此焉。因論語孔子言未見者而致疑爾。鄭未察此乃子思子言之也。僖二十五年公羊傳云。宋三世無大夫。三世內娶也。此譏其內娶大夫女也。鄭注酌焉。取與娶通。女子十年不出。禮內則文。歸寧父母。詩葛覃毛傳宜從也。魯語云。公父文伯之母朝哭穆伯而暮哭文伯。仲尼聞之曰。季氏之婦可謂知禮矣。愛而無私。上下有章。蓋穆伯者文伯之父也。文伯卒其

母敬姜哭之。此以其暮哭子。遂追言其朝哭夫。非竝喪也。
韋注云。禮寡婦不夜哭。據此義也。公父。讀父若甫。經曰。夫
禮坊民所淫。其淫之甚者淫以佚。經文曲達焉。釋文。洙音
逸。本又作佚。蓋義同。

子云。昏禮。壻親迎。見於舅姑。舅姑承子以授壻。恐事之違也。以
此坊民。婦猶有不至者。賢。過去聲。見。

鄭氏曰。舅姑。妻之父母也。妻之父爲外舅。妻之母爲外姑。
父戒女曰。夙夜毋違命。母戒女曰。毋違宮事。不至。不親夫
以孝舅姑也。春秋。成公九年。春。二月。伯姬歸于宋。夏季。孫
行父如宋。致女。是時。宋共公不親迎。恐其有違而致之也。

父與甫通
共音恭

謹案承奉也。壻親迎而舅姑俾女子承奉之。故曰承子。不至不來也。詩國風序曰。東門之楊。刺時也。昏姻失時。男女多違。親迎女猶有不至者。毛傳曰。期而不至也。序曰。丰。刺亂也。昏姻之道缺。陽倡而陰不和。男行而女不隨。毛傳曰。時有違而不至者。蓋女違男也。於是乎親迎者有言。則男女相違矣。君子曰。今瀕嫁而逃者何多也。序其信乎。○經曰。大爲之坊。民猶踰之。非謂民踰禮坊而不可止也。蓋謂所以助禮之坊者宜明也。故分節而列其踰禮坊若斯。則所以助禮之坊者不煩言而明矣。舉陶謨曰。天秩有禮。自我五禮五庸哉。又曰。天討有罪。五刑五用哉。君子若虞之伯夷者。迪民以天秩之禮。折民以天討之刑。其播告之。

命協於天矣。此舉陶所以能明刑而化苗民也。周盛時。禮自天子出。征伐亦自天子出。魯語所謂大刑用甲兵也。其君子禮行。非措刑而刑措。民皆從命。蓋民踰坊而終不踰矣。子思子閔周衰時之變。能不懷古君子乎。老子導民將以愚之。非明之以禮。申韓不知禮而尙刑。其命民皆失也。坊非所坊也。欲安國民者。奚不念子思子言爲哲學哉。賜反。丰音豐。倡音唱。和去聲。瀕音濱。措七故反。

釋曰。鄭言外舅外姑者。釋親文。言毋違者。士昏禮記文。言致女者。春秋穀梁傳說也。鄭禮器注云。致之言至也。極也。此以言坊記謂事之不至焉。此鄭義也。釋詁云。來至也。則至亦來也。士昏禮曰。婦至。其祝辭曰。來婦。則坊記可明矣。

尙書說五禮與周官說同。詳上文疏釋。詰云庸常也。魯語云。刑五而已。大刑用甲兵。其次用斧鉞。中刑用刀鋸。其次用鑽竿。薄刑用鞭扑。此於皋陶五刑近之矣。史記周本紀云。成康之際。刑錯四十餘年不用。錯與措通。置也。史記列傳申不害韓非與老子同傳焉。蓋申韓刑名皆原於老子道德之意也。

禮記子思子言鄭注補正卷一終

門弟子校栞於讀書堂